

Herremättli-Clique 1983

Sujet:

Fuessgängerzoone fir Läbensmiedi

E Bebbi het - lehnd my verzelle -
dr Clarablatz beträtte welle,
denn dä, sygsch niechter oder bsoffe,
isch numme no fir's Fuessvolgg offe.
Kasch bschaulich bummle, gmietlig schnere,
do darfsch, do ka dy niemerts schtere;
schtatt, ass dy Abgasgschtängg verdriesse,
kasch gsundi Knoblauchfahne gniesse.

Drum het's dr Bebbi mächtig gnosse,
tschalpt ibers Drottwar unverdrosse,
doch pletzlich ghert ärls kreisch - und tittle,
e Kiehlergrill tuschiert sy Fidle
vo hinte, schtuucht sy Wirbelsyle,
denn schtülp't's en vorwärts, voll uf d'Byle
und us em Waage schreyt's (zem Schämme):
"Hösch, tramp doch nit my Coupé zämme!"

"Bisch bsoffe, oder hesch e Kurze?
Wenn d' scho so doof muesch ummefurze,
lueg amme, wo den aanezugglisch,
ass d' nit no tyrer Bläch verbugglisch".
Waisch, d' Plaaner hän scho kalkuliert,
ass d'Fuessvolggzoone denn rentiert,
wenn sy erlaubt isch fir dr Kare -
zum Arbeitsloosi iberfahre!

Mechtsch nit gärn psych - und physisch lyd
sottsch als dr Clarablatz vermyde:
e Maischterschtig an Schtroosseplanig
(das haisst: Vo Planig gar kai Ahnig.)
und dorum fuessgang-superfindlig,
drfir extreem computerfrindlig:
Hochelektronisch - au am Zyschdig -
verbuecht dä d'Clarablatz-Schtatischig:

12 mool pro Wuche Musggelzerig,
all Viertelschtund e Kreislaufschterig,
an 15 Bai e groosse Riss,
9 Schogg und 17 Hooseschiss,
ai hoffnigsloosi Gsässverränggig,
8 mool e miserabli Sänggig,
11 Hünd, dr Braitwäg zämmegwalzt
2 AJZler lycht abplattet,
10 Punkies schrottryff ummegschpattet,
an 24 Edeldame
e bitzli 's Chassi gschtuucht (dr Rahme!),
aim Typ die dritte Zehn saniert,
ain fascht und ai ne ganz kaschtriert.
Drfir sin d'Auti nie verräblet
und heggschtens als e bitz vergräblet!

Wär glaubt, me kenn in Fuessvolggzoone
dr Kerper samt de Närke schoone,
isch scho dr letschti Insulaner.
Dä weiss no nyt vo Basler Plaaner!
Fuessgängerzoone haisst fir mänge:
bläschschaadefrey dur's Fuessvolgg längge
und jede muess, wo do will laufe,
bym Strahm e Panzer-Korsett kaufe.

Glasfiberschtabhochschpringerschtange
sin's Bescht, wenn d' wottsch kai Bruch yfange:
Mit aim Satz gumpsch denn ohni Schregge
in erschte Shtogg vom Schiefen Egge,
kunnsch us aim Trubel - will uns schyne -
in anderer Verkehrsbrüch yne,
doch ains isch sicher: Dä Verkehr
befridiget dr Bebbi mehr!

Dr Johann Peter Hebel sälig
wurd psychiaterryff allmählig,
är wurd dr Plaanerbummi rybe
und ungefähr das Värslu schrybe:
Uff em Clarablatz
butzt's sogar e Schpatz!
Wenn d' nit kasch uff d'Sytte renne,
iberfahrt dy Jedi Penne,
dangg de Plaaner z' Basel an mym Rhy
bisch nimm tauglig fir dr Zirkus Knie!

Am Fasnachtszyschtig vo demorge am nynt bis
znacht am elfi und am Mittwuchmorge vom
nynt bis am elfi goht me in d'Muschtermäss
an d'Ladärne-Usstellig.